




ԷԿՈՒՄԵՆԻԿ ԿՅԱՆՔ

ՀԱՅԿԱՍՏԱՆԻ ԵԿԵՂԵՑԻՆԵՐԻ ԿԵՆՏՐՈՆԱԿԱՆ ԿՈՄԻՏԵԻ ՏԱՐԵԿԱՆ ՆԱՏԱՇՐՋԱՆԸ

ՀԱՅԿԱՍՏԱՆԻ ԵԿԵՂԵՑԻՆԵՐԻ ԿԵՆՏՐՈՆԱԿԱՆ ԿՈՄԻՏԵԻ ՏԱՐԵԿԱՆ ՆԱՏԱՇՐՋԱՆԸ

ԵԿԵՂԵՑԻՆԵՐԻ ՀԱՄԱՇԽԱՐՀԱՅԻՆ ԽՈՐՀՐԴԻ ԿԵՆՏՐՈՆԱԿԱՆ ԿՈՄԻՏԵԻ ՏԱՐԵԿԱՆ ՆԱՏԱՇՐՋԱՆԸ

Սույն թվականի հունվարի 20—28 օրերին Հարավային Աֆրիկայի Յոհաննեսբուրգ քաղաքի մոտակայքում տեղի ունեցավ Եկեղեցիների Համաշխարհային Խորհրդի Կենտրոնական Կոմիտեի տարեկան հերթական նստաշրջանը: Նստաշրջանին մասնակցում էին, բացի Կենտրոնական Կոմիտեի անդամներից և ԵՀԽ-ի պաշտոնեությունից, դիտորդներ, խորհրդականներ և երիտասարդության ներկայացուցիչներ՝ ընդամենը շուրջ 300 հոգի:

Ժողովը նստաշրջանում լսեց ԵՀԽ-ի գլխավոր քարտուղար դր. Կոնրադ Ռայզերի և Կենտրոնական Կոմիտեի ատենապետ Տ. Արամ Արքեպիսկոպոս Քեշիշյանի հաշվետու զեկուցումները նախորդ ժողովից մինչև ներկա նստաշրջանն ընկած ժամանակաշրջանում ԵՀԽ-ի և նրա առանձին բաժանմունքների գործունեության մասին:

Նստաշրջանում առանձին զեկուցումներ լսվեցին «Հավատո և Կարգի» հանձնաժողովի, Սանտիագո դե Կոմպոստելլո (Իսպանիա) քաղաքում կայացած վերջին համագումարի, ԵՀԽ-ի և Հոռնեական Կաթոլիկ Եկեղեցու միջև զարգացող հարաբերությունների, եկեղեցում աշխարհականների ներգրավման և նրանց դերի, Հարավային Աֆրիկայում եկեղեցական կյանքի անցյալ և ներկա վիճակի, կանանց իրավունքների պաշտպանությանը նըվիրված տասնամյակի ներկա փուլում կատարված աշխատանքների, մարդկության կյանքին սպառնացող Սիդա վարակիչ հիվանդության հասցրած վնասների ու նրա կանխարգելման, ինչպես նաև այլ հարցերի մասին:

Ապա նստաշրջանի մասնակիցները հետագա օրերին հինգ խմբերի բաժանվելով՝ քննարկեցին իրենց բաժանմունքներին վերաբերող հարցեր, ինչպիսիք էին՝ եկեղեցական միության, աստվածաբանական կրթության, կանանց և երիտասարդների դաստիարակության, առաքելության և ավետարանչության, հասարակության և արդարության, ցեղային խտրականության և անդամ Եկեղեցիները մտահոգող այլ բազմաթիվ քաղաքական, ընկերային հարցեր:

Նստաշրջանի օրերին տեղի ունեցան հատուկ հանդիպումներ Կենտրոնական Կոմիտեի անդամ Օրթոդոքս Եկեղեցիների ներկայացուցիչների

միջև, որոնց ընթացքում շեշտվեց ԵՀԽ-ի գործունեության ոլորտում Օրթոդոքս Եկեղեցիների առավել գործուն մասնակցության անհրաժեշտությունը: Հանդիպումներ ունեցան նաև նախկին Խորհրդային Միության, Արևելյան Եվրոպայի երկրների Եկեղեցիների ներկայացուցիչները, որոնք իրենց երկրներում կրոնական, քաղաքական, տնտեսական, ընկերային կյանքի իրավիճակի մասին տեղեկություններ հաղորդեցին:

Հունվարի 22-ին, շաբաթ օրը, տեղի ունեցավ Հարավային Աֆրիկայի մշակույթին նվիրված երեկո, որին ներկա եղան նստաշրջանի բոլոր մասնակիցները և տեղական Եկեղեցիների հոգևոր առաջնորդները:

Նստաշրջանի սկզբում Յոհաննեսբուրգ քաղաքի Ավետարանական Մայր եկեղեցում տեղի ունեցավ նստաշրջանի բացման հանդիսավոր արարողություն՝ մասնակցությամբ Հարավ-Աֆրիկյան քրիստոնեական Եկեղեցիների հոգևոր առաջնորդների, որոնց շարքում էր նաև Տուտու Արքեպիսկոպոսը:

Հունվարի 28-ին, երեկոյան, նիստերի դադարում տեղի ունեցավ նստաշրջանի փակման արարողությունը:

Սույն նստաշրջանում ԵՀԽ-ի նոր անդամներ ընտրվեցին Ալբանիայի Օրթոդոքս Եկեղեցին և Հարավ-Աֆրիկյան Ավետարանական Եկեղեցին:

ՆԵՐՍԵՍ ԱՐՔԵՊԻՍԿՈՊՈՍ ՊՈԶԱՊԱԼՅԱՆ
Անդամ Եկեղեցիների Համաշխարհային Խորհրդի
Կենտրոնական Կոմիտեի

